


Gesine Wanke

Plattdüütsch vun Ingrid Straumer

Mammut un Corona

Deel 1



© Heidrun Schlieker

Bssssst. Bssssst. Bssssst. Sst.Sst.Sst.

Nu hett de dicke Brummer sik in dat Spinnennett in de Eck öer Mias Bett fungen.

Dat Mammut liggt op'n Ruch op dat Bett un kickt den spaddelnden Brummer to. He puust langsam „pfffft“ de Luft ut un kleit sik mit sienen Rüssel an de Rippen ünner op de linke Siet. Dor al dat drüdde Mol. He hett sik ok al veermol or so op de rechte Siet an de Rippen kleit un ok achter de Ohren. Tominnst sössmol. Un dorbi jöckt em dat Fell nichmol. Em is blots so bannig langwielig. Un dor is blots disse Corona Schuld an!

Wegen Corona hebbt de Scholen dichtmookt. Mias School, Dominiks School un de Hunnenschool. Sogor Papas Uni is dicht. Un ok Mama geiht blots noch den halven Dag op Arbeit. Den annern halven Dag sitt se to Huus mit ehr'n Laptop an'n Kökendisch un hett schlechte Luun.

Dorüm hett se ok so bannig schimpt as lütt Mammut versöcht hett, wat he nich mit den Rüssel an dat Spinnennett anlangen kann, wenn he op dat Bett hoch noog hopsen kann. Man dat kunn he nich, wegen de dösiggen Latten ut den Lattenrost tweibroken sünd. Klor hett Mama dat Pultern hört, keem glieks anlopen un füng dat Schimpen an. Dorüm leeg he dor nu un harr Langewiel. Al den helen Morgen leeg he dor. Un allens blots wegen disse Corona.

Egens harr allens wunnerbor sien kunnt. Dat wöör bilütten warm buten, de Blumen blöhn un de ersten Immen summen in de Beeten. Dat harr ween kunnt as wenn Ferien weern. Ferien, in de en al an'n Morrn anfüng to speelen, meddags en korte Paus möök un nomeddags tuschen dä or op de Rosen oppassen or Football speelen. Man nee, Corona harr ja utgerekent Huusopgaven geven musst. Utgerekent Huusopgaven!

Nu seten Mia un Dominik bi Papa in't Büro un möken de hele Tied Huusopgaven! Also meist de hele Tied. Also, tominnst bit to'n Meddageten. Nichmol richtig Platz weer ünner'n Schrievdisch för lütt Mammut, dat he den Rüssel üm Papa sien Fööt leggen kunn. Se harrn ja all jemehr Fööt ünner'n Disch. Dat weer dor gor nich recht kommodig. All nääslang stünn een op or dor wöör snackt. Mammut kunn sik dor gor nich richtig konzentreeren ünner'n Schrievdisch.

Mammut süüfz nochmol un rull sik vun dat Bett dool. Villicht sull he in'n Goorn gahn? Villicht 'n beten üm dat Nest vun de Amsel rümsliekern? Siet dat Corona all Lüüd no Huus schickt hett, sitt se jümmerto in ehr Nest un schreet wat vun „soziale Distanz“ wenn'n to neeg rankümmt. Villicht kunn he dor ok den Eekkoter to kriegen, dat de Hubertus en poor Nööt op den Kopp fallen lett, wenn de ünner den Boom liggt to slopen. Villicht sull he ok en poor Blomen ümplanten för Mama, dat de ehr schlechte Luun loswöör.

Lütt Mammut leep no de Glasdöör un sä en poormol „öpf“ bit Dominik ut dat Büro keem un em in'n Goorn leet. He weer man knapp rut ut de Döör, do keem em een Idee! De Idee weer grootordig, famos, wunnerbor! Mammut wöhl sik sien Hoor dör'nanner vör luder Opregen! Worüm weer he dor blots nich eher op komen? Mia un Dominik ward heel ut de Tüüt ween, wenn se dat wies ward!

Schriev an disse Steed sülvst wieder:

Wat för'n Idee hett lütt Mammut? Wat mookt he in'n Goorn alleen, wenn Mia un Dominik öber jemehr Huusopgaven sweten doot?